

## Вужудимиз ибодат учун яратилган



16:49 / 27.03.2025 1404

Рамазоннинг охирги кунлари ҳам етиб келди. Ибодатларга янада жидду жаҳд билан киришадиган паллалар...

Юртимизнинг кўпгина масжидларида Қуръон хатмлари ўз поёнига етди. Хатмларда тик туриб оғриб қолаётган бу оёқларимиз эртага қиёматда фойдамизга гувоҳлик беради, иншаАллоҳ! Оёқларимиз билан ножоиз жойларга қадам босган бўлсак, масжидлардаги хатмларда туришимиз ўша гуноҳларга каффорат бўлишидан умидвормиз!

Вужудимиз ибодат учун яратилган. Шундай экан, беҳисоб савоблар бериладиган ушбу ойда ибодатларга маҳкам бўлайлик. Зеро, ҳали ҳам биз учун жаннат эшиклари очиқ, ҳануз жаҳаннам эшиклари ёпиқ, ашаддий душманимиз шайтон эса кишандан бўшатилмаган. Ҳар лаҳзада Аллоҳ таолонинг раҳматию мағфиратига мушарраф бўлишимиз, жаҳаннам

оловидан озодликка эришиш имконимиз бор.

Рамазон ойидаги солиҳ амалларимизни шу қадар кўпайтиришимиз лозимки, улар Рамазондан кейин ҳам, тоинки умримизнинг охиригача шайтонга, нафсимизга қарши курашишда биз учун қалқон бўлсин!  
Қалқонимизнинг мустаҳкамлиги ўз қўлимизда!

Аллоҳим, барчамизга Рамазоннинг қадрини топишни насиб қилгин!  
Қалқонимизни мустаҳкам қиладиган солиҳ амалларга илҳомлантириб қўй!  
Зеро, бу дунёда биздан талаб қилинадигани – истиқоматда бўлишдир,  
яъни солиҳ амалларни қилишга Рамазонда ёки бошқа бир вақтда қаттиқ киришиб, бир оздан кейин тўхтаб қолмасдан, уларда бардавом бўлишдир.

Аллоҳим барчамизни истиқоматда бўлишимизга муваффақ айла!

**«Рамазон соғинчи» китобидан олинди**

Ушбу китоб Ўзбекистон Республикаси Дин ишлари бўйича қўмитасининг 2021 йил 11 февралдаги 03-07/905-рақамли хулосаси асосида чоп этилган.